



Шочмо эл, порылык да чын верч!

Будь готов /

33-шо (3681) №,
2024 ий 16 август,
кугарня



0+

Имде лий

1933 ий 1 февраль годсек лектеш.



Финн-угор: тый да мый, Келшымаш мемнам уша!

Йошкар-Ола воктенyse Куяр посёлкышто верланыше «Авангард» сарзе-патриот рүдер ик арнялан шкешотан усталык школыш савырнен. Тушто финн-угор тўнямбал йоча лагерь коло кандашымше гана эрта-ралтын. Лагерьыш Карелий, Коми, Удмурт, Мордовий, Марий Эл, Татарстан, Башкортостан республик-ла, Угарман, Виче кундемла гыч 150 наре ўдыр-рвезе погынен. Финн-угор калык-шамычын йочашт-влак кугезе родо-тукымын вожшым шымленят, самырык лидерын школыштыжо шинчымашым погынат да усталык мастерскойшто мастарлыкштым вяянденят.

Финн-угор лагерьыште 11 ансамбль шочмо кундемyse тўвыражым ончыктен. Кажне делегаций шкеж нерген палдарен.

Снимкыште: түрлө кундем гыч толшо ўдыр-рвезе-влак.

Умбакыже – 3-шо лаптыкыште.



Карелий Республик Калевала посёлко гыч кантелист-влакын калык ансамбльже.

Эртыме корным палыман



Марий кугыжаныш университетын «Воскресение» кычалше студент отрядшын ўдыр-рвезыже-влак Звенигово район Таир посёлкышто верланыше «Журавушка» рўдериште каныше йоча-шамыч дене вашлиймашым эртареныт (**снимкыште**).

Мероприятий Россий Президент В.В.Путинын темлымыж почеш эртарыме «Без срока давности» научно-просветительский проект радамыште лийын. Тыгай проект самырык тукымым гражданско-

патриотизм шўлышлан кумыланда, Шочмо элым пагалаш туныкта.

«Воскресение» отрядын боецше-шамыч подростко-влаклан, тыгак Запорожский область ден ДНР гыч толшо йоча-шамычлан Кугу Ачамланде сарлан пўлеклалтше ончерым ямдыленыт, тўрлў саргуралым ончыктеныт. Кенез каныш жапыште 1500 утла икшыве ончерым ужын да поисковик-влак дене вашлийын мутланен.

Л.ГРИГОРЬЕВА ямдылен.
Фотом отрядын архивше гыч налме.

Сандалыкым шымлат

Звенигово районысо «Движение Первых» толкынын чолга енге Константин Павлов (**снимкыште**) Байконурышто космический ракетым колтымым шке шинчаж дене ужеш. Тудо да эше чумыр Россий гыч 88 сеныше «Космическая экспедиция Первых» всероссийский проектын кок этапыштыже кўкшў лектышым ончыктеныт. Танасымашын тўн призшым – «Байконур» космодромыш каяш путўкым – сенен налыныт. Ёдыр-рвезе-влак тестлан вашмутым пуэныт, сандалыкыште космический шўкшакым корандыме шотышто творческий проектым возыныт. Д.Ф.Устинов лўмеш «ВОЕНМЕХ» Балтийский кугыжаныш технический университетын экспертше-влак эн сай паша-шамычым ойыреныт. Константинын проектшат ты радамыш логалын.

Л.НИКОЛАЕВА ямдылен.



Фотом Марий Эл Республикысе Образований да науко министрствын сайтше гыч налме.

Российысе увер

«Шочмо йылме да шочмо литератур денен эн сай туныктышо» российысе конкурсын иктешлыше йыжыгыштыже 36 педагог танаса. 17 сентябрьште Татарстан Республикыште очный этап тўналеш. Сенгыше-влакым 21 сентябрьште Озан олаште саламлат.

Кумылан кажне ег «Диалог с окружающим миром: нарисуй, покажи, расскажи» российысе конкурсын ушнен кертеш. Йодмашым да паша-влакым 15 сентябрь марте колтымман. Тўрыс увер – vsekonkursy.ru сайтшыште.

Пўрткайыкым шотлымо «Воробы на кустах» всероссийский перепись 18 август марте эртаралтеш. Пакчаште я уремыште вашлиялтше кажне кайыкым шотлыман, войзашат лишеш. Уверым vorohey.nbud.ru сайтыш 20 август марте колтымман.

Марий Элысе увер

Марий Эл Республикысе Тўвыра, печать да калык-влакын пашашт шотышто министрствын увертарымыж почеш регионьшто «Пушкин карте» дене могай мероприятийыш ушнен керте мерген палдарыше чат-бот лектын. Тудо «ВКонтакте» соцкылыште Сферум тунемме профильшыште верланен.

«Кино йўд» российысе акций 24 августышто эртаралтеш. Йошкар-Олаште Тўвыра да каныме рўдў паркыште «Воздух», «Сто лет тому вперёд», «По щучьему велению» фильм-влакым ончаш лишеш.

Йошкар-Оласе 1-ше номеран книгагудым «Культура» нацпроект почеш олмыктеныт. Рўдолаште кумшо модельный библиотекекылан шотлалтеш. Книгагудылан компьютерым, ноутбукым, кум тўжем кумшўдў утла книга да молымат налыныт.

Тўналтышыже – 1-ше лаштыкыште.



Финн-угор: тый да мый, Келшымаш мемнам уша!

«Еш – илыш памаш»

Тенийсе лагерь «Еш – илыш памаш» ўжмаш почеш пашам ыштен. Ятыр уста еш дене вашлиймаш-влак лийыныт.

– Лагерьыш Марий Эл да Удмурт республикла гыч еш-влак толыныт. Нуно «Еш архив» конкурсшко ушненыт, лагерьын ойырымо туржым эртенят. Ме нуным еш фестивальыш ўжышна. Тудо лагерьын программаштыже у лийын да ик эн тўн ужашым айлен, – ойла Марий Эл Республикысе «Эр вий» йоча да самырык-влак ушемын вуйлатышыже М.М.Маланова. – Участник-шамыч тукым кокласе кыл, ике калыкын йўлажым аклыше ешын онай илышыж нерген пален налыныт. Еш унагудышто фиточай рецептм, тукымвож пушенгым ышташ тунемыныт.

Теве Анастасия ден Иван Каменщиковмыт тымарте финн-угор лагерьыште организатор да туныктышо семын пашам ыштеныт гын, тенийсе сменяште нуно самырык ешын символжылан шотлалтыныт. Шукерте огыл Марий кундемысе пўртўс коклаште эртарыме марий сўанышт шочмо калыкын йўлажым пагалымыштым пенгыдемден. «Лагерьыште кажне ен ике сомылжым шуктен. Мый йоча-шамычлан мастер-классым эртаренам, олым шўвырым ышташ туныктенам, марий семўзгарла дене палдаренам, – каласкала Иван. – Настя организатор семын тыршен. Чылан пырля, келшен пашам ыштымеке, кўкшў лектышыш, шонымашке шуынна».



«Патыр-влакын модышышт» конкурс годым.



И.Каменщиков мастер-классым вўда.

Тўвыра поянлык

Финн-угор лагерь – тўрлў калык кокласе кылым пенгыдемдыше, икте-весеылан тўвырам палдарыше вашлиймаш. Весымат палемдыман: ты лагерьыште йочашт годым усталыкыштым пойдарыше ўдыр-рвезе-влак, жап эртымеке, тышке вожатый семын пашам ышташ пўртылыт. Теве Татарстан Республик Кукмара район Уял гыч Ангелина Ирбулдина 2016 ийыште финн-угор лагерьын участникше лийын. А тений «Кна вел» ансамбльжым конден (пурла снимкыште). «Финн-угор лагерьын паша опытишо моткоч поян. Йочам годым чылажымат вес шинчаончалтыш дене акленам. Кеч тунамат икем моткоч пиаланлан шотленам: «Ўдырсий» пайремыште сенъшыш лектынам ыле, – ойла Ангелина. – Кызыт ике пашаштем кучылташ шонен, шинчымашем келгемдаш, ум пален налаш толынам да йоча-влакым конденам. Родо-шамычым ике кундем тўвырана дене палдаренна».

Коми Республик Сясьольский район Межадор селасе «Колип-

кайас» («Турий») йоча образцовый ансамбльыш коштышо икшыве-влак (шола снимкыште) финн-угор лагерьыште тылеч ончычат лийыныт. Вуйлатышышт – О.Е.Некрасова. Теният уло кумылын ушненыт. Нуно калык мурышт, куштымашышт дене палымым ыштеныт. «Тўрлў вашлиймаш, лекций, мастарлык-класс, спорт да туныктымо урок-влак, экскурсий – чылажат онай да пайдале лийын. Эн тўнжў – икте-весеым умылымаш да келшымаш. Тидыжак мемнам иктеш уша да виян улмынам ончыкта», – манеш ансамбль вуйлатыше Ольга Егоровна.

Участник-влаклан ты лагерьыште налме шинчымаш ончыкыжым кўлеш лишеш. Уа гыч тодаш, кумыж гыч ўзгарым ышташ, курчакым ямдылаш, тўрым тўрлаш, кўслем, кантелем шокташ тунемыныт. Вет лагерьын тўн шонымашыжат лач тыгай лийын: финн-угор калыкын эртыме корныжым да йўлажым, тўвыражым шымлаш кумыландымаш.

В.ГОРОХОВА.
М.Маськован фотожо-влак.

Чавайн



тукым цына

Йылме – илыш

Марий йылме – тиде илыш. Коча-ковам марла кутыренет. Мый марий кундемыште шочынам, марий улам, марла мутланем. Самырык тукым тудым мондышаш огыл. Марий ом лий гын, «Марий юнкор» усталык школышкат ом логал ыле, Йошкар-Олан мотор верлаштыжат ом кошт ыле. Шочмо марий йылмым мондаш огеш күл! Пагалыза тудым! Шочмо йылме дене кутыраш ида вожыл!

Карина ГОРДЕЕВА.
Параньга, Матародо.

Тест

Марий АССР-ын калык поэтше Макс Майнын шочмыжлан – 110 ий.



1. Кунам шочын?

- А) 1914 ий
8 август.
- Б) 1904 ий
10 август.
- В) 1924 ий 16 август.

2. Шочмо верже

кушто верланен?

- А) Морко район Овдасола ял.
- Б) Медведево район Непот ял.
- В) Советский район Кодам ял.

3. Могай газетыште

пашам ыштен?

- А) «Марий Эл».
- Б) «Ямде лий».
- В) «Марий коммуна».

4. Икымше поэзий сборникше

могай лийын?

- А) «Пеледше мланде».
- Б) «Патыр-шамыч».
- В) «Патырлык нерген муро».

5. «Калык поэт» чаплұмым

кунам пуэзыт?

- А) 1964 ий.
- Б) 1974 ий.
- В) 1972 ий.

Усталык шўлышан

Усталык шўлышан Варвара Щербакова (снимкыште) Йошкар-Оласе 80-ше номеран «Ўжара» йочасадыш коштеш. Тудлан улыжат – ныл ий. Тиде жапыште лишыл енге-шамычым ик гана веле огыл сенымаш дене куандарен. Варвара почеламутым сылнын лудаш йората. Икымше сенымашыже Йошкар-Оласе туныктымо управленийын эртарыме конкурсыштыжо лийын: кумшо верыш лектын.

Варваран аваж ден ачаже Марина Игоревна ден Михаил Евгеньевич марий шўлышан улыт. Олаште илат гынат, икшывышт марла мутланыже, йылмым палыже манын тыршат. Тыгай ача-ава-влак ончылно вуйым савыман. Воспитательже Н.В.Годунова, ўдырын марий улмыжым пален налмекеже, «Колумб лудмаш» конкурслан ямдылен. Йошкар-Олаште эртаралтше ты конкурсышто Варвара Валентин Колумбын «Рывыж ден агытан» почеламутшо дене шке ийготан-шамыч коклаште кокымшо лийын. Морко районышто эртаралтше регион-влак коклаше сылнымут да мурсем фестиваль-конкурсышто ты почеламут денак



кокымшо верыш лектын. Кажне сенымаш ончыкыжымат тыршаш кумылым луктеш.

– Варвара моткоч чулым да пўсö уш-акылан кушкеш. Почеламутлам пеш писын шарнен кодеи. Сценыште икенжым кучен мошта. Ўшанем, лудмаш конкурслаште икымше верламат налаш тўналына, – оила воспитательже Надежда Владимировна.

Ўдырлан волгыдо ончыкылыкым, сенымашым, тыгак чолга да марий шўлышан лияш тыланена.

В.МАМАЕВА.

Фотом еш архив гыч налме.

Тоштерыш
вашке

Марий тўвыра – тиде марий калыкын поянлыкше. Тудым арален кодаш манын, марий калык чот тырша. Тўрлö сынан пайремым, шымлыме пашам эртарат, илышыш шындарат, самырык тукымлан палдарат. Марий ўдыр-влак ожнысек кидпашалан мастер лийыныт. Нуно сылнын тўрленет. Марий калыкын йўлажым, эртыме корныжым пален налаш кумылан улат гын, тоштерлаш корным кучыман.

Марина НИКОЛАЕВА.
Советский, Кельмаксола.

Тушто

Ош пасу, шем пырче, кө ўда, тудак пога.

Олмапу – окапу, тўжем тўрлö саска.

Ит вожыл
мутланаш

Шочмо йылме – эн шерге

поянлык,

Кумда тўнясе пўтынь калыкнан.

Кажне йылмын йонга

семже ямлын,

Ший энгерла йоргыктен йога.

Пагалыман калыкын йўлажым,

Йылметым сайын от пале –

тунем.

Кугезе тукымын күсле кыл

семжым

Шыман пералте, кумылым

нөлтен.

Ит мондо нигунам тый шке

йылметым,

Ит вожыл тудын дене мутланаш.

Марий улат гын, шонымашетым

Ит өр йолташетлан марла ойлаш.

Анна ПРОХОРОВА.

Шернур посёлко.

Марий ўдыр

Марий сълнымут марий икшывылан поснак лишыл. Тушто чылажат умылаш лийше шочмо марий йылме дене возалтын. Кажне шомакше раш да палыме. Почеламутым сълнын лудмо годым тидым поснак шижаш лишеш. Морко район Зеленогорск школышто тунемше Надя Иванова (**снимкыште**) лач ты шонымашымак пенгыдемден каласыш. Изи ўдыр «Колумб лудмаш» регион-влак кокласе сълнымут да мурсем фестиваль-конкурсшто тений усталыкшым ончыктен. В.Х.Колумбын «Шояк Павыл» почеламутшым лудмыж дене иктагашыже-влак коклаште кокымшо верыш лектын.



– *Мый кокымшо классым тунем пытаренам. Туныктышем Елена Васильевна Кириллова сълнымутлан шўманда, – ойла Надя. – Тудо эре «Тый кертат, тыланет ўшанем» манын кумыланда. Кугыеҥын шомакше-влак мыланем вийым да ўшаным пуат. Тылец ончыч Морко по-*

сёлкышто эртаралтше тана-сымашке София йолташ ўдырем дене миенна. Тушто ойлымашым лудынна. Мыланем прозымат, почеламутымат лудаш келша. Вет мый марий ўдыр улам.

А.НИКОЛАЕВА.
Авторын фотожо.

Лудса книгаг

Лудмо книгаг уэш-пачаш шергалаш моткоч йўратем. Изиракем годым тудым ик семын умыленам гын, кызыт ушышто вес тўрлў шонымаш-влак пўрдыт. Жап эртымеке, тиде сълнымутымак эше вес семын аклаш тўналат. Южо книгаже чонышто кугу кышам кода. Герой-влак дене пырля коклан утен кайымеш воштылат, южгунам шинчавўдым йоктарашат логалеш. Туге гынат кажне йоча книгаг лудаш кумылан огыл. Молан тыге? Сото телефоным арам титаклат, шонем. Йочан кумылжо лийшаш. Тунам веле шонымашке шуат. Мыняр шукырак лудат, тунар ушанрак лият.

Юля ЯГОДАРОВА.
Советский, Кельмаксола.

Воштончыш гай

Мыйым марий йылмемын ончыкылыкшо тургыжландара. Айдемылан илышыште пенгыдын йол ўмбалне шогаш мо кўлеш? Мыйын шонымаште, йўратыме да йўратыше еш, тазалык да шочмо йылме. Ача-авада пеленда гын, те эн пиалан улыда. Тазалык илышыште эн кўлешан. А шочмо йылме айдемын ўмырыштыжў могай верым айла? Кажне калыкын эн мотор, эн йўратыме, эн ныжыл йылмыже уло. Шочмо йылме – калыкын чонжо, илыш воштончышыжо. Самырык тукумлан кушкаш, тўзланаш вийым пуышо памаш. Шочмо йылме уло гын, калыкшат ила, виянеш. Марий йылмынам мондена гын, эн кугу поянлыкым йомдарена. Тудым ава семын йўратыман да аралыман! Кумылым пыштен тунемман, марла утларак мутланыман!

Александра БЕРЕЗИНА.
1-ше номеран Шернур школ.

Ушан ой

Сълнымут литератур илышым, еҥ-влакым чын умылаш туныкта. Литератур айдемым шонаш тарата. Умыледа: литература – айдемым.

Валентин КОСОРОТОВ.

Кроссворд

Николай Арбанын «Кенегэ йўд» комедийже почеш.

Шола гыч пурлашке: 2. Мыскарам ойлаш йўрата. 3. «Волгыдо» колхозын бухгалтерже. 6. Колхоз председатель. 7. Туныктышо. 9. Сар гыч пўртылшў рвезе.

Кўшычын ўлыкў: 1. Катялан полшышо рвезе. 2. Музыкальный комедийын тўн геройжо. 4. Мыскарачын пелашыже. 5. Ольган йолташ ўдыржў. 8. Мыскараче.



				1					
	2								
3								4	
			5		6				
			7		8				
								9	

В.СМИРНОВ ямдылен.



Уш-акылетым терге!

- Уремыште йолын коштмо ужаш кузе маналтеш?
- Уремым вончымо годым эн ончыч кудо велышке ончалман?
- Автобус але машина гыч во-лымеке, корным кузе вончман?
- Светофорын могай тулжо йўлымö годым корным вончаш лиеш?
- Корнывожышто модаш лиеш але ок лий?
- Корным вончымо ужаш могай янлыкым ушештара?
- Тўшка транспорт дене кайыше еным кузе маныт?

Йочасадыште каж-не ньога шарнышаш:

- 1.Тоя дене ит мод: шкендым але йолта-шетым эмгатен кертат.
- 2.Вуй гыч ит кыре – еным сусырташ лиеш.
- 3.Кўшыч ит төрштыл: камвонат, кидетым але йолетым тодыл кертат.
4. Шкаф ўмбак ит күзö: арве-рым сўмырет, шкеже эмганет.
- 5.Умшаш нимогай арверым ит чыке.
- 6.Кочмо годым ит мутлане. Кочкышым умша тич ит шўш – логарыш шындет.

Калыкмут

- ◀ Пуримо деч ончыч лекме нерген шоналте.
- ◀ Эркын кает – мўндыркырак миен шуат.
- ◀ Курым мучко иле – курым мучко тунем.

Лўдыкшыдымылык урок

Йоча йырым-йырысе тўням кажне кечын шымла, ум пален налаш, тамлен ончаш төча, кидыш налаш тырша. Тыгодым түрлө йондымылыкыш логалын, таза-лыкклан энтекем ыштен кертеш. Азап ынже лий манын, йоча-шамычым изинек ямдылыман, лўдыкшыдымылык нерген мутланыман, корнышто коштмо, уремыште, мөнгыштö, пўртгү-сыштö шкем чын кучымо нерген правил-влакым ушештарыман.



Ошма сўрет

Изи йоча-влакклан ошма дене модаш келша. Шекланен от шукто гын, тудат коклан энтекем конден кертеш. Кугыенлан пеш тўткө лийман. Ошмам кучылтын, сўретлаш моткоч онай. Эн ончыч яндар ошмам коштыман. Вара түрлө тўсан чия дене чиялтыман. Келшыше сўретым ойырыман. Тушко ПВА клейым йыгыман. Ўмбакыже келшыше тўсан ошмам шавыман, утыжым корандыман. Ошма уке гын, манне шўрашым кучылташ лиеш.

Лаштыкым Медведево посёлкысо 6-шо номеран «Онгыр» йочам виандыме рўдерын кугурак воспитательже Ольга Валерьевна КАЗАНЦЕВА ямдылен.



Айста модына

Түрлө тўсан тул

Икшыве-влакклан правилым шарнен кодаш модыш-шамыч полшат. Воспитатель түрлө тўсан светофорым ончыкта, а йоча-влак тыгай движенийым ыштат: ужал тўс гын, йол дене тават; нарынче гын, совым кырат; йошкар тўс гын, шып шинчат.

Лиеш – ок лий

Йоча-шамыч онгыш шогалыт, икте-весеылан мечым кышкен модыт. Мом ышташ лиеш, а мом огеш лий – ойлат. Мутлан, воспитатель йодеш: «Изи икшывылан уютюгым чўкташ лиеш але ок лий?» Йоча мечым куча да вашешта.

Изи кидмастар

Рвезе-шамыч машина дене модаш йöратат. Нунын дене пырля корнысо знак-влакым ышташ лиеш. Мутлан, светофорым. Тидлан күлеш: картон, клей, вашкүзö, түрлө тўсан кагаз, панга, ате петыртыш.

Картон гыч прямоугольником пўчкын лукташ. Түрлө тўсан кагаз гыч кум онтым келыштараш да картоныш клеитлаш. Картоным пангаш пентгыдемдаш. Ямде светофорым верандаш манын, ате петыртышым кучылташ лиеш.

Пожарныйлан күлшö ўзгар-влакым муаш полшо





Сылнылык тўняште

Кенеж сылне игечыж дене веле огыл, тўрлө семын волгалтше, ойыртегалтше тўсшө дене кумылым нөлта. Ошын-йошкар-гын, кандын-ужаргын лойгалтше мотор пеледыш-влак поснак куандарат. Теве Морко район Унчо селаште илыше Л.Л.Григорьева тўрлө сорт пеледышым ончен кушта. Эр шошым шуко росотам ямдыла, пошкудо-шамычлан темла. А шке илемжым йомак кугыжанышыш савыра. Любовь Любомировналан Вова эргыж ден

Евгения изи ўдыржө (снимкыште) кертмышт семын польшкалат. Вўдым шават, шўкшудым сомылат. Кушкыл-шамычын виянмыштым эскераш кумылан улыт. *«Йоча-влакым изинек пўртўсын моторлыкшым ужаши, аралаш, кўлмө годым ўяндышым шаваш туныкташ гын, нуно поро кумылан, осал ден сайым умылышо, вес енлан полшаши ямде улишо кушкыт»*, – ойла ава.

Л.НИКОЛАЕВА.

Фотом еш архив гыч налме.

20 август – Чебурашкын шочмо кечыже.

Йомакысе персонажым серызе Эдуард Успенский 1966 ийыште шонен луктын. Тунам тудын «Крокодил Гена и его друзья» повестьше савыкталтын. Чебурашка калыкыште 1968 ийыште «Крокодил Гена» мультфильм лекме деч вара кумдан чапланен. Чебурашкын шочмо кечыжым 2005 ий гыч палемдаш тўналыныт. Тулык икшыве-влаклан поро кумылым ончыктыммо акцияым эртарыме годым Э.Успенский 20 августым йомак персонажын шочмо кечыже семын палемдаш темлен.

2004 ден 2006 ийлаште Чебурашка Олимпиадыште Россиянын сборной командыжын талисманже лийын.

Сўретым чиялтыза.



Историйым шергалына

1799 ий 15 августышто руш войска генерал А.В.Суворовын вуйлатымыж почеш Нови ола (Италий) воктене кресталмаште француз-влакым сепен.

1914 ий 20 августышто Икымше тўнямбал сар годым Гумбиннен ола воктене кресталмаште руш армий немич войскам сепен. Руш салтак-влаклан Эрвел Пруссийыш корно почылтын.

1939 ий 20 августышто Г.Г.Жуковын вуйлатымыж почеш совет войска Халхин-Гол энгер воктене япон войска ваштареш наступленийым тўналын.

19 август – Фотографийын тўнямбал кечыже.

«Марий Эл» увер агентствын фотографше И.Н.Речкин икмынар кангашым темла:



- ★ Чапле фотом фотоаппарат дене ыштыман.
- ★ Снимкым ыштыме годым тулын кузе логалмыжым эскерыман.
- ★ Камерым пенгыдын кучыман.
- ★ Фотошто композицийлан кугу верым ойырыман.
- ★ Фотом тўрлө семын ыштен ончыман: кўшыч, ўлыч, ўрдыж гыч, лишыч але тора гыч.
- ★ Сай снимкым ышташ тунемаш манын, чўчкыдынрак да шукрыак фотографироватлыман.
- ★ Фотограф весела кумылан, мутланаш йўрагыше лийшаш.



0+

Марий Эл Республикасысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор – А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикасысе Тўвыра, печать да калык-влакын пашашт шотышто министерстве, Марий Эл Республикасысе «Марий Эл» увер агентстве» КАУ.

Редакций да издатель: Марий Эл Республикасысе «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо пўрт. Тел. 8(8362) 45-22-82.

Газетым редакцийыште погымо да верстатлыме, «Марий Эл Республикасысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт тўрлө лийын кертыт. Серыш-влак мўнгеш огыт колталт. Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru (автор-влаклан)
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01404, 2023 ий 22 сентябрьыште пумы.

Конкурс



Никита ТИМОФЕЕВ.
Йошкар-Ола.



Феликс ЛАРИОНОВ.
Медведево посёлко.

Кеҗеж
канышемын
ик оҗай татше

Түшто

- ? Шулдыржо уло – ок чонеште, йолжо уке, но поктен от шу. Мо тиде?
- ? Пылышыже уке – колеш, кидше уке, но воза.
- ? Иктым шуэнам – кормыжим погенам.
- ? Шонго кова ик верыште шога.


«П» буква дене

Писе паша

Петр Павлович, Павел Петрович пашам пеш писын пыта-рат. Пинегым пукшат, пошкудо Прохорлан пырням пышташ полшат. Прохорын пырняже пеш пенгыде, пёрт пураланак. Понго пагыт. Пасушко понгым погаш писештыт.

Ксения ПЕТРОВА.
Морко, Коркатово.


Шотлыза.



Шола ве-
лысе сүретым
ончен, пурла
могырышто
цифр-влакым
ушыза да
чиялыза.



Ик шырым верже дене вашталтен,
чын вашмутым ыштыза.




Палыза, могай кайыкым сүретлыме?



Даша ПОПОВАН сүретше.
Йошкар-Оласе 30-шо номеран
«Берёзка» йочасада.

Кайык, насекомый ден
янык-влакым келшыше
пёртышт дене ушыза.



МАРИЙСКИЙ НАЦИОНАЛЬНЫЙ ТЕАТР ДРАМЫ ИМ. М. ШКЕТАНА

З. ДОЛГОВА, С. ЯНДУКОВА

СЕРЕБРЯНАЯ ПАМПАЛЧЕ

17 августа 16:00

МИУЗИКЛ

8 (862) 78-13-78
ШКЕТАН.RU